

Broj: 03-02-767/2022  
Sarajevo, 17.06.2022. godine

**PARLAMENT FEDERACIJE  
BOSNE I HERCEGOVINE**

- Predstavnički dom -  
gosp. Mirsad Zaimović, predsjedavajući ✓
- Dom naroda -  
gosp. Tomislav Martinović, predsjedavajući

Poštovani,

U skladu sa članom IV.B.3.7.c) (III) Ustava Federacije BiH, a u vezi sa odredbama čl. 163, 164. i 165. Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08 i 26/20) i čl. 155, 156. i 157. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09 i 24/20), **radi razmatranja i prihvatanja, dostavljam Vam NACRT ZAKONA O IZMJENAMA I DOPUNAMA ZAKONA O ODUZIMANJU NEZAKONITO STEČENE IMOVINE KRIVIČNIM DJELOM**, koji je utvrdila Vlada Federacije Bosne i Hercegovine na 319. sjednici, održanoj 16.06.2022. godine.

Nacrt zakona se dostavlja na službenim jezicima i pismima Federacije Bosne i Hercegovine u printanoj i elektronskoj formi (CD).

S poštovanjem,



**PREMIJER**  
Fadil Novalić

- Prilog: - Nacrt zakona na bosanskom jeziku,  
- Odredbe Zakona koje se mijenjaju i dopunjuju,  
- Izjava o usklađenosti,  
- Obrazac broj 2,  
- Obrazac IFP DA i  
- Zakon o oduzimanju nezakonito stečene imovine krivičnim djelom („Službene novine Federacije BiH“, broj 71/14) (CD).

**Cc: Federalna agencija za upravljanje oduzetom imovinom**  
gosp. Vinko Jakić, direktor

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**NACRT**

**ZAKON  
O IZMJENAMA I DOPUNAMA ZAKONA O ODUZIMANJU  
NEZAKONITO STEČENE IMOVINE KRIVIČNIM DJELOM**

**Sarajevo, juni 2022. godine**

**Z A K O N**  
**O IZMJENAMA I DOPUNAMA ZAKONA O ODUZIMANJU**  
**NEZAKONITO STEČENE IMOVINE KRIVIČNIM DJELOM**

**Član 1.**  
**(Značenje izraza u ovom zakonu)**

U Zakonu o oduzimanju nezakonito stečene imovine krivičnim djelom („Službene novine Federacije BiH“, broj 71/14), u članu 4. stav (1) iza tačke j. dodaje se nova tačka k) koja glasi:

- „k) Upravljanje oduzetom imovinom u smislu ovog zakona podrazumijeva poslove: izvršenja sudskih odluka o privremenom i trajnom oduzimanju imovine, procjene, skladištenja, čuvanja, korištenja, iznajmljivanja, davanja u zakup, prodaje, raspodjele dobijenih prihoda, poklona, uništenja, povrata imovine i drugih poslova u skladu sa zakonom.“

Dosadašnje tač. k) i l) postaju tač. l) i lj).

**Član 2.**  
**(Provođenje finansijske istrage)**

U članu 9. dodaje se novi stav (5) koji glasi:

- „(5) Tužilac može u svrhu provođenja finansijske istrage zatražiti od Agencije da angažuje vanjska stručna lica radi obavljanja poslova finansijskih vještačenja. Sredstva za ovu namjenu obezbjeđuju se u budžetu Federacije Bosne i Hercegovine iz prihoda proisteklih primjenom ovog zakona.“

Dosadašnji st. (5), (6), (7) (8) i (9) postaju st. (6), (7), (8), (9) i (10).

Iza stava (10) dodaje se novi stav (11) koji glasi:

- „(11) U svrhu obezbjeđenja izvršenja sporazuma o priznanju krivnje u pogledu oduzimanja imovinske koristi stečene krivičnim djelom, tužilaštvo može Agenciji povjeriti na čuvanje novčana sredstva ili drugi oblik imovine koji je predmet pregovora sporazuma o priznaju krivnje.“

**Član 3.**

Član 14. mijenja se i glasi:

**„Član 14.**  
**(Postupanje sa predmetima krivičnog djela i prekršaja)**

- (1) Predmeti koji se u krivičnom postupku i predmeti i imovinska korist koji se u prekršajnom postupku, prema odluci suda, trajno oduzmu, povjeravaju se Agenciji na upravljanje.
- (2) Na poslove upravljanja predmetima i imovinskom koristi iz stava (1) ovog člana primjenjuju se odredbe ovog zakona kojim se uređuju postupci upravljanja trajno oduzetom imovinom nezakonito stečenom krivičnim djelom.



- (3) Privremeno oduzete predmete u krivičnom postupku sud može povjeriti Agenciji na čuvanje u skladu s odredbama ZKPFBIH.
- (4) Odredbe st. (1) do (3) ovog člana ne odnose se na oružje, eksploziv te supstance za koje se sumnja da su opojna droga.“

#### **Član 4. (Osiguranje oduzimanja imovinske koristi)**

U članu 17. stav (2), tačka a) riječi: „čuvanje i“ brišu se.

U tački b) riječ „čuvanje“ zamjenjuje se riječju „upravljanje“.

U tački f) riječi: „ili postavljanjem privremene uprave u društvu“ brišu se.

Stav (7) mijenja se i glasi:

„(7) Izvršenje rješenja iz stava (3) ovog člana provodi sud, neposredno Agencija u skladu s ovlastima iz člana 27. stav (5) ovog zakona, i drugi organi određeni zakonom.“

Iza stava (7) dodaju se novi st. (8) i (9) koji glase:

„(8) Rješenjem iz stava (3) ovog člana sud određuje koji organ je dužan da preduzeme pojedine radnje u provođenju izvršenja rješenja, uzimajući u obzir vrstu imovine koja se oduzima.

(9) Tužilac će i prije zvaničnog podnošenja prijedloga sudu za donošenja rješenja o određivanju privremenih mjera iz ovog člana, ostvariti potrebnu saradnju s Agencijom radi pravovremenog poduzimanja potrebnih radnji za efikasno oduzimanje i upravljanje privremeno oduzetom imovinom.“

Dosadašnji st. (8) i (9) postaju st. (10) i (11).

Iza stava (11) dodaju se novi st. (12) i (13) koji glase:

„(12) Nadležni javni registri dužni su odmah, a najkasnije u roku od 3 dana izvršiti potrebne upise po zahtjevu Agencije, a koji se odnose na poslove koji proizilaze iz rješenja o određivanju privremenih mjera osiguranja.

(13) Određivanjem privremene mjere prekidaju se svi drugi pravni postupci koji se vode povodom imovine koja je predmet privremene mjere i to sve dok privremena mjera traje.“

#### **Član 5.**

Član 24. mijenja se i glasi:

„Član 24.  
(Izvršenje)

(1) Izvršenje presude kojom se oduzimaju stvari koje predstavljaju nezakonito stečenu imovinsku korist neposredno provodi Agencija u skladu s ovlaštenjima propisanim stavom (5) člana 27. ovog zakona, pod uslovom da lice od kojih se stvari oduzimaju dobrovoljno ne izvrši presudu.

(2) Izvršenje presude kojom se oduzima nezakonito stečena imovinska koristi, koja je presudom izražena u novčanoj protuvrijednosti, a koju lice od kojeg se ista oduzima



- ne izvrši dobrovoljno, određuje se i provodi na prijedlog Federalne agencije za upravljanje oduzetom imovinom u skladu sa Zakonom o izvršnom postupku.
- (3) Postupak iz stava (2) ovog člana, odnosno prijedlog za izvršenje, Agencija može pokrenuti i u slučaju iz stava (1) ovog člana.
- (4) Provođenje izvršenja rješenja u izvršnom postupku iz stava (2) i (3) ovog člana sud može u potpunosti ili djelomično povjeriti Agenciji.“

#### **Član 6. (Organizacija Agencije)**

U članu 26. stav (5) mijenja se i glasi:

“(5) Direktor rukovodi Agencijom, zastupa Agenciju, te odgovara za zakonitost rada, pravilno i zakonito vođenje materijalno-finansijskog poslovanja Agencije.

Iza stava (5) dodaje se novi stav (6) koji glasi:

(6) Direktor je dužan jednom godišnje podnijeti izvještaj o radu Agencije Vladi Federacije Bosne i Hercegovine“.

#### **Član 7.**

Član 27. mijenja se i glasi:

#### **„Član 27. (Radnopravni status zaposlenika Agencije)**

Član 27. mijenja se i glasi:

- „(1) Na radnopravni status osoba zaposlenih u Agenciji primjenjuju se odredbe Zakona o državnoj službi u Federaciji Bosne i Hercegovine i Zakona o namještenicima u organima državne službe u Federaciji Bosne i Hercegovine.
- (2) Za određena radna mjesta državnih službenika i namještenika u Agenciji koji obavljaju poslove pod posebnim uslovima rada i odgovornostima propisanim unutrašnjim aktima koji regulišu radne odnose sredstva za plaće stiču se pod istim uslovima koji važe za ostale državne službenike i namještenike uvećana do 20 % osnovne plaće.
- (3) Visina dodatka na plaću po osnovu posebnih uslova rada iz stava (2) ovog člana utvrđuje se aktom Agencije koji uređuje pitanja plaća i naknada.
- (4) Pri obavljanju poslova iz nadležnosti Agencije ovlašteni službenik Agencije kod predstavljanja koristi službenu legitimaciju i značku Agencije, čiji oblik i način upotrebe pravilnikom propisuje direktor Agencije.
- (5) Službenici Agencije koji rade na poslovima izvršenja sudskih odluka o oduzimanju nezakonito stečene imovine u svom djelovanju imaju ovlaštenja i obaveze koje imaju sudski izvršioci u skladu sa članom 43. i 44. Zakona o izvršnom postupku.“

#### **Član 8.**

Čl. 28. i 29. brišu se.

## **Član 9. (Nadležnosti)**

U članu 30. stavu (1) iza tačke a. dodaje se nova tačka b. koja glasi:

- b) „privremeno i trajno oduzetom imovinom po osnovu odluka Suda Bosne i Hercegovine, sudova Republike Srpske, sudova Brčko Distrikta Bosne i Hercegovine, te imovinom čije je raspolaganje ograničeno, u skladu s odlukama organa Ujedinjenih nacija i drugih međunarodnih organizacija, čiji je član Bosna i Hercegovina.“

Dosadašnje tačke b. c. i d. postaju tačke c. d. i e.

Iza stava (2) dodaju se novi st. (3) i (4) koji glase:

- „(3) U svrhu prikupljanja informacija i podataka za potrebe sačinjavanja analiza, izvještaja i drugih poslova iz nadležnosti utvrđenih ovim zakonom, Agenciji će se omogućiti pristup sistemu za automatsko upravljanje predmetima u pogledu finansijskih istraga i oduzimanja nezakonito stečene imovinske koristi.“
- (4) Uslovi i način pristupa sistemu iz stava (3) ovog člana propisat će se posebnim Pravilnikom koji donosi direktor Agencije uz prethodno pribavljeno mišljenje Visokog sudskog i tužilačkog vijeća.“

## **Član 10.**

Član 32. mijenja se i glasi:

### **„Član 32.**

**(Prodaja privremeno i trajno oduzete imovine)**

- (1) Prodaja trajno oduzete imovine kojom u smislu ovog zakona upravlja i raspolaže Agencija vrši se javnim nadmetanjem koje se objavljuje u „Službenim novinama Federacije BiH“ i u najmanje jednom dnevnom listu koji se distribuira na području cijele Bosne i Hercegovine.
- (2) U slučaju da je procijenjena vrijednost trajno oduzete imovine niža od 10.000,00 KM, javno nadmetanje može biti objavljeno samo na web stranici Agencije.
- (3) Imovina se prodaje po istoj ili višoj cijeni od procijenjene vrijednosti.
- (4) U slučaju da imovina ne bude prodana nakon prvog javnog nadmetanja, prodaja se može izvršiti na drugom javnom nadmetanju, ali za cijenu koja ne može biti niža od 50% vrijednosti procijenjene imovine.
- (5) Ako se radi o privremeno oduzetoj pokretnoj imovini, Agencija može uz objavu javnog nadmetanja po proceduri iz ovog člana koja se odnosi na trajno oduzetu imovinu, donijeti odluku o prodaji iste u svrhu očuvanja novčane protuvrijednosti imovine.
- (6) U slučaju da imovina iz stava (5) ovog člana ne bude prodana nakon prvog javnog nadmetanja, prodaja se može vršiti više puta, ali za cijenu koja ne može biti umanjena više od 10% vrijednosti procijenjene imovine u trenutku donošenja odluke o prodaji.
- (7) Prodaja imovine kojom upravlja i raspolaže Agencija, kao i drugi postupci iz ovog zakona gdje se provodi javno nadmetanje, može se vršiti i putem elektronskog internet sistema e-aukcije.



- (8) Agencija će nakon provedenog postupka iz st. (5) i (6) ovog člana obavijestiti sud koji je odredio mjere osiguranja te imovine.
- (9) Upravljanje i prodaja dionica i drugih vrijednosnih papira vrši se u skladu sa zakonima koji uređuju tržište vrijednosnih papira.
- (10) Vlada Federacije Bosne i Hercegovine će na prijedlog direktora Agencije donijeti poseban propis kojim će se detaljnije urediti uslovi i postupci koji se odnose na poslove upravljanja imovinom i to: izvršenja sudskih odluka o privremenom i trajnom oduzimanju imovine, procjenu, skladištenje, čuvanje, korištenje, iznajmljivanje, davanje u zakup, prodaju, raspodjelu dobijenih prihoda, poklon, uništenje, povrat, kao i druga pitanja koja proizilaze iz poslova upravljanja imovinom.

#### Član 11.

Iza člana 33. dodaju se novi čl. od 33a. do 33e. koji glase:

##### „Član 33a. (Poklon trajno oduzete imovine)

- (1) Trajno oduzeta imovina, kao i dio novčanih prihoda ostvarenih prodajom, najmom, davanjem u zakup oduzete imovine, ili nekim drugim poslom upravljanja, može biti poklonjena u humanitarne, društveno korisne i druge svrhe od javnog interesa.
- (2) Odluku o poklonu trajno oduzete imovine kao i dijela prihoda iz stava (1) ovog člana na prijedlog direktora Agencije donosi Vlada Federacije Bosne i Hercegovine.

##### Član 33b. (Troškovi upravljanja)

- (1) Troškovi upravljanja oduzetom imovinom osiguravaju se u budžetu Federacije Bosne i Hercegovine, te od novčanih sredstava iz člana 36. stava (4) ovog zakona.
- (2) Vlada Federacije Bosne i Hercegovine će na osnovu zahtjeva direktora Agencije donijeti posebne odluke o priznavanju i plaćanju troškova upravljanja oduzetom imovinom, ukoliko se takvi troškovi ne nalaze u godišnjem budžetu Agencije, a isti se namiruju iz budžeta Federacije Bosne i Hercegovine iz prihoda proisteklih primjenom ovog zakona.

##### Član 33c. (Uništenje)

- (1) Oduzeta imovina koja zbog svojih svojstava predstavlja prijetnju životu i zdravlju ljudi i životinja, zaštiti životne sredine, bezbjednosnih i drugih razloga, obavezno se uništava.
- (2) Odluku o uništenju imovine iz stava (1) ovog člana, donosi direktor Agencije.
- (3) Ako se trajno oduzeta imovina ni nakon drugog nadmetanja ne proda, ne pokloni ili ne uspije iznajmiti, izdati u zakup ili na drugi način iskoristiti u skladu s namjenom, Vlada Federacije Bosne i Hercegovine može na prijedlog direktora Agencije odlučiti da se ista uništi.
- (4) U slučajevima neuspjele prodaje udjela trajno oduzetih privrednih društava, kao i u slučajevima nelikvidnosti, provodi se postupak likvidacije.



- (5) Likvidacija trajno oduzetih privrednih društava može se provesti i prije provođenja postupka prodaje, s tim da se imovina preostala nakon postupka likvidacije koristi u skladu s odredbama ovog zakona o postupanju sa trajno oduzetom imovinom.
- (6) Troškove uništenja imovine snosi Agencija, dok se troškovi likvidacije privrednih društava namiruju iz sredstava tih privrednih društava.

#### Član 33d.

##### (Davanje na korištenje)

- (1) Trajno oduzeta imovina može se dodijeliti na korištenje institucijama koje se primarno finansiraju iz budžeta Federacije Bosne i Hercegovine, kao i u humanitarne, društveno korisne i druge svrhe od javnog interesa.
- (2) Odluku o dodijeli na korištenje trajno oduzete imovine donosi Vlada Federacije Bosne i Hercegovine, na prijedlog direktora Agencije, a sve u skladu s namjenom oduzete imovine.
- (3) U ovisnosti od vrste trajno oduzete imovine, Vlada Federacije Bosne i Hercegovine, na prijedlog direktora Agencije može donijeti odluku o korištenju iste za potrebe Agencije, a u skladu s njenom namjenom.
- (4) U slučajevima iz stava (1) ovog člana zaključuje se ugovor o korištenju predmetne imovine između Agencije i lica kojem je ista data na korištenje, a kojim se detaljnije regulišu prava i obaveze ugovornih strana.
- (5) Lica iz stava (1) ovog člana kojima je imovina dodijeljena na korištenje, dužna su da se sa istom opходе pažnjom dobrog domaćina, odnosno privrednika.
- (6) Detaljniji postupak i uslovi dodjele na korištenje trajno oduzete imovine će se propisati posebnim propisom iz člana 32. stav (10) ovog zakona.

#### Član 33e.

##### (Zabrana učešća)

- (1) U postupcima koji se odnose na prodaju, najam, zakup, poklon i davanje na korištenje oduzete imovine, po službenoj dužnosti će se voditi računa o transparentnosti postupaka, te zabrani učešća u svojstvu zainteresovanih lica, licima zaposlenim u Agenciji, licima od kojih je oduzeta imovina, službenim osobama, tužiocima i sudijama koji su učestvovali u predmetnom krivičnom postupku, te članovima porodice navedenih kategorija.
- (2) Članovi porodice, u smislu ovog zakona, jesu: bračni i vanbračni partner, bivši bračni i vanbračni partner, krvni srodnik u ravnoj liniji, usvojitelj i usvojenik, srodnik u pobočnoj liniji do trećeg stepena zaključno i srodnik po tazbini do drugog stepena zaključno.
- (3) Pravo učešća u postupcima iz stava (1) ovog člana u svojstvu zainteresovanih lica nemaju ni pravna lica u kojima lica iz stava (1) ovog člana imaju udjele koji im omogućavaju većinsko pravo donošenja odluka u istom.
- (4) Izuzetak od stava (1) ovog člana odnosi se na mogućnost davanja na korištenje ili zakup privremeno oduzetih nekretnina bračnom partneru, djeci i roditeljima lica od kojih je ista oduzeta ukoliko su u trenutku oduzimanja istu i koristili.
- (5) Lica iz stava (4) ovog člana kojima je nekretnina data na korištenje ili u zakup dužni su s pažnjom dobrog domaćina postupati sa istom.
- (6) Zainteresovana lica u kontekstu odredbe ovog člana su lica koja se pojavljuju kao potencijalni kupac, zakupac, poklonoprimac, odnosno korisnik imovine.



## Član 12.

Član 34. mijenja se i glasi:

### „Član 34.

(Novčana sredstva od upravljanja privremeno oduzetom imovinom)

- (1) Privremeno oduzeta novčana sredstva, kao i novčana sredstva dobijena iz poslova upravljanja privremeno oduzetom imovinom Agencija drži na posebnim računima.
- (2) Vlasniku privremeno oduzete imovine za koju je u skladu s ovim zakonom odlukom suda utvrđeno da ne potiče iz krivičnog djela, na osnovu odluke suda, bez odgađanja se vraćaju novčana sredstva iz stava (1) ovog člana s posebnog računa Agencije.
- (3) Vlasniku privremeno oduzete imovine za koju je u skladu s ovim zakonom odlukom suda utvrđeno da ne potiče iz krivičnog djela, a koja je u momentu oduzimanja bila pod zakupom, u slučaju da je Agencija istu nastavila izdavati u zakup, tako ostvareni prihodi na osnovu odluke suda bez odgađanja se vraćaju vlasniku i to maksimalno do iznosa prihoda koje je vlasnik ostvarivao prije oduzimanja, te umanjeni za iznos troškova koje je Agencija imala u toku trajanja privremene mjere u pogledu održavanja oduzete imovine.
- (4) Prihodi od zakupa u slučajevima iz stava (3) koji su ostvareni iznad iznosa koje je vlasnik imovine ostvarivao u trenutku privremenog oduzimanja, ostaju na posebnom računu Agencije.
- (5) Vlasnik koji smatra da isplatom sredstava nije isplaćena adekvatna vrijednost, može podnijeti Agenciji zahtjev za naknadu štete prouzrokovane privremenim upravljanjem oduzete imovine od strane Agencije.
- (6) Ako zahtjev za naknadu štete iz stava (5) ovog člana ne bude usvojen ili Agencija ne donese odluku o tom zahtjevu u roku od tri mjeseca od dana podnošenja zahtjeva, vlasnik te imovine može nadležnom sudu podnijeti tužbu za naknadu štete protiv Federacije Bosne i Hercegovine.

Iza člana 34. dodaju se novi čl. 34a. i 34b. koji glase:

### „Član 34a.

(Povrat privremeno oduzete imovine)

- (1) Privremeno oduzeta imovina za koju je u skladu s ovim zakonom, odlukom suda utvrđeno da ne potiče iz krivičnog djela, a ukoliko ista nije prodana ili na neki drugi način otuđena ili uništena tokom privremenog upravljanja, Agencija bez odgađanja vraća vlasniku, odnosno licu kojem je sudskom odlukom određeno vraćanje privremeno oduzete imovine.
- (2) Ako lice iz stava (1) ovog člana, ne preuzme imovinu u roku od 6 mjeseci od urednog dostavljanja poziva za preuzimanje imovine od strane Agencije, ili u roku od jedne godine od objavljivanja poziva od strane Agencije po proceduri iz stava (3) ovog člana, sud će utvrditi da imovina postaje vlasništvo Federacije Bosne i Hercegovine.
- (3) Ako lice iz stava (1) ovog člana ne primi poziv za preuzimanje imovine od strane Agencije iz razloga što mu je nepoznato prebivalište i boravište, ili se nalazi u inostranstvu a dostava se nije mogla obaviti, ili nekog drugog razloga, Agencija u roku od 15 dana od dana utvrđivanja navedenih činjenica objavljuje predmetni



poziv i to u dva dnevna lista koja se distribuiraju na cijelom području Bosne i Hercegovine i „Službenim novinama Federacije BiH“, s upozorenjem da će po proteku roka iz stava (2) ovog člana imovina postati vlasništvo Federacije Bosne i Hercegovine.

- (4) O proteku rokova iz stava (2) ovog člana Agencija je dužna obavijestiti sud, te mu o tome predložiti dokaze.
- (5) Odluku iz stava (2) ovog člana donosi sud koji je donio odluku o vraćanju privremeno oduzete imovine, te je dostavlja Agenciji na dalje postupanje.
- (6) Odluku o načinu upravljanja imovinom iz stava (2) ovog člana donosi Vlada Federacije Bosne i Hercegovine na prijedlog direktora Agencija.
- (7) Na oduzetu imovinu iz stava (1) ovog člana primjenjuju se pravila i postupci propisani ovim zakonom koji se odnose na upravljanje privremeno oduzetom imovinom, i to sve do momenta predaje vlasniku, odnosno ispunjenja uslova iz stava (2) ovog člana.

#### Član 34b. (Posebni računi)

- (1) Agencija se u okviru svog redovnog poslovanja finansira iz budžeta Federacije Bosne i Hercegovine u okviru Jedinog računa trezora budžeta Federacije Bosne i Hercegovine.
- (2) Za potrebe upravljanja oduzetom imovinom Agencija otvara posebne račune.
- (3) Jedan poseban račun, Agencija koristi isključivo za deponovanje privremeno oduzetog gotovog novca.
- (4) Ostale posebne račune Agencija koristi za deponovanje novčanih sredstava ostvarenih prihodom od upravljanja privremeno oduzetom imovinom, te korištenje istih u svrhu određenu članom 36. stav (4) ovog zakona.
- (5) Posebne račune Agencija može otvoriti kod komercijalnih banaka.“

#### Član 13.

Član 36. mijenja se i glasi:

#### „Član 36. (Prihodi od upravljanja trajno oduzetom imovinom)

- (1) Trajno oduzeta novčana sredstva, prihodi dobijeni od upravljanja trajno oduzetom imovinom i prihodi dobijeni od upravljanja privremeno oduzetom imovinom u slučajevima trajnog oduzimanja imovine uplaćuju se na Depozitni račun budžeta Federacije Bosne i Hercegovine umanjeni za troškove proistekle iz poslova upravljanja tom imovinom, koji ostaju na posebnom računu Agencije.
- (2) Troškovi iz stava (1) ovog člana odnose se na troškove nastale redovnim i vanrednim održavanjem nekretnina, transportom i održavanjem motornih vozila i drugih pokretnih stvari, troškove i prihode nastali osiguranjem oduzete imovine, te sve druge troškove koji proizilaze iz prirode održavanja i čuvanja oduzete imovine.
- (3) Dio prihoda iz stava (1) ovog člana koji pripada budžetu Federacije Bosne i Hercegovine može se koristiti u svrhu i namjenu propisanu članom 33a. ovog zakona, te rad Agencije.
- (4) Novčana sredstva koja ostaju na posebnom računu Agencije koriste se za finansiranje troškova upravljanja oduzetom imovinom, rad Agencije, te naknadu



štete za koju se utvrdi da je prouzrokovana privremenim upravljanjem od strane Agencije.

- (5) Ako su novčana sredstva iz stava (4) ovog člana nedovoljna, razlika sredstava se obezbjeđuje iz budžeta Federacije Bosne i Hercegovine iz prihoda proisteklih primjenom ovog zakona.
- (6) U svrhu obavljanja registrovane djelatnosti, odnosno sticanja prihoda, novčana sredstva iz stava (4) ovog člana mogu se koristiti za poslovanje pravnog lica čiji udjel je povjeren Agenciji na privremeno upravljanje.

#### **Član 14. (Prijelazne i završne odredbe)**

U članu 40. stav (3) mijenja se i glasi:

- „(3) Vlada Federacije Bosne i Hercegovine će u roku od 6 mjeseci od dana stupanja na snagu ovog zakona donijeti poseban propis iz člana 32. stav (10) ovog zakona na prijedlog direktora Agencije.

Iza stava (3) dodaju se st. (4) i (5) koji glase:

- „(4) Direktor Agencije će u roku od 30 dana od dana stupanja na snagu ovog zakona donijeti Pravilnik iz člana 27. stav (4) ovog zakona.
- (5) Postupci koji se odnose na izvršenje sudskih odluka o privremenom i trajnom oduzimanju imovine, procjenu, skladištenje, čuvanje, korištenje, iznajmljivanje, davanje u zakup, prodaju, raspodjelu dobijenih prihoda, poklon, uništenje i povrat oduzete imovine, a koji nisu započeti prije stupanja na snagu ovog zakona, provest će se po odredbama ovog zakona.“

#### **Član 15. (Stupanje na snagu)**

Ovaj zakon stupa na snagu osmog dana od dana objavljivanja u „Službenim novinama Federacije BiH“.

**OBRAZLOŽENJE**  
**NACRTA ZAKONA O IZMJENAMA I DOPUNAMA ZAKONA O ODUZIMANJU**  
**NEZAKONITO STEČENE IMOVINE KRIVIČNIM DJELOM**

**I - USTAVNI OSNOV**

Ustavni osnov za donošenje ovog Zakona sadržan je u poglavlju IV A. 5. 20. d. kojim je propisano da je Parlament Federacije Bosne i Hercegovine nadležan za donošenje Zakona o vršenju funkcija federalne vlasti.

**II - RAZLOZI ZA DONOŠENJE**

Razlozi za donošenje ovog zakona zasnovani su na bazi primjene dosadašnjih praktičnih iskustava u primjeni Zakona o oduzimanju nezakonito stečene imovine krivičnim djelom („Službene novine Federacije BiH“, broj 71/14). U tom smislu potrebno je izvršiti preciziranje odredbi koje se odnose na upravljanje oduzetom imovinom, odnosno definisati sami pojam „upravljanja“ s obzirom na to da je dosadašnje zakonsko rješenje ostavljalo prostora za različita tumačenja pojedinih izraza koji se odnose na postupanje privremeno ili trajno oduzetom imovinom, a sve navedeno u kontekstu efikasnijeg izvršavanja sudskih odluka o oduzimanju nezakonito stečene imovine krivičnim djelom od strane Agencije. Također, potrebno je unaprijediti cjelokupan sistem postupanja privremeno i trajno oduzetom imovinom. Kada je u pitanju upravljanje privremeno oduzetom imovinom, potrebno je propisati različite modalitete postupanja istom, a sve u svrhu očuvanja njene vrijednosti ili novčane protuvrijednosti, naročito u slučaju povrata takve imovine vlasnicima, a sve radi sprečavanja nastanka štete po Federaciju Bosne i Hercegovine. Kada je u pitanju trajno oduzeta imovina, prema trenutnim zakonskim rješenjem kao primarna, ali može se reći i jedina, „opcija“ postavljena je prodaja oduzete imovine, te eventualno poklon u slučaju da navedena prodaja ne uspije. Međutim, s obzirom na to da trajno oduzeta imovina postaje vlasništvo Federacije Bosne i Hercegovine, potrebno je ostaviti različite mogućnosti postupanja takvom imovinom, a sve u svrhu bolje ekonomske iskoristivosti iste u smislu „ubiranja plodova“ od takve imovine ili davanja iste na korištenje određenim subjektima. Također, predložene izmjene zakona treba da omoguće upotrebu oduzete imovine na način da ista primarno bude iskorištena u humanitarne, društveno korisne i druge svrhe od javnog interesa. Sve navedeno iz razloga prilagođavanja dosadašnje prakse sa dobrom praksom zemalja regiona i članica Evropske unije, koje imaju znatno više iskustva u pogledu upravljanja oduzetom imovinom stečenom krivičnim djelom.

**III - OBRAZLOŽENJE ZAKONSKIH ODREDBI**

Član 1. - U članu 4. koji propisuje značenje pojedinih izraza, potrebno je definisati pojam upravljanja imovinom. Trenutne odredbe Zakona o oduzimanju nezakonito stečene imovine krivičnim djelom, niti na jednom mjestu ne definišu pojam upravljanja imovinom, a ono je u središtu samog „interesovanja“ Zakona, odnosno osnovna nadležnost Agencije za upravljanje oduzetom imovinom. U tom smislu potrebno je definisati da upravljanje oduzetom imovinom u smislu ovog zakona podrazumijeva poslove izvršenja sudskih odluka o privremenom i trajnom oduzimanju imovine, procjene, skladištenja, čuvanja, korištenja, iznajmljivanja, davanja u zakup, prodaje,



raspodjele dobijenih prihoda, poklona, uništenja, povrata i drugih poslova u skladu sa zakonom. Predmetna definicija predstavlja zajednički pojam za različite oblike postupanja sa oduzetom imovinom, koji se mogu podvesti pod termin "upravljanje". Navedeno je bitno i zbog same ujednačenosti terminologije u samom zakonu, s obzirom na to da trenutna zakonska rješenja dovode do zabune u pogledu tumačenja pojedinih izraza (čuvanje, upravljanje i sl.), naročito prilikom donošenja sudskih odluka, prije svega rješenja o određivanju privremene mjere osiguranja i povjeravanja imovine Agenciji na daljnje postupanje.

Stvarnopravna teorija pod upravljanjem podrazumijeva korištenje i raspolaganje. Korištenje predstavlja ekonomsko iskorištavanje stvari, uključujući i crpljenje plodova. Raspolaganje podrazumijeva disponiranje različitim ovlastima u pogledu imovine, poput otuđenja stvari putem kupoprodaje, davanja stvari na korištenje putem zakupa, davanja na upotrebu putem posudbe ili najma, itd. Stoga se čini opravdanim koristiti opšti termin „upravljanje“ za sve oblike postupanja privremeno i trajno oduzetom imovinom stečenom krivičnim djelima.

Također, definicija termina "upravljanje" sadržana je u zakonima koji se odnose na upravljanje oduzetom imovinom i to u entitetu Republike Srpska, zatim Crna Gora i Hrvatska, što znači da su pravni sistemi u okruženju svojim zakonima definisali ovaj termin, pa je neophodno da se isto učini i predmetnim Zakonom u Federaciji Bosne i Hercegovine.

Član 2. - Jedna od ključnih stvari u provođenju finansijskih istraga jesu finansijska vještačenja, odnosno praćenje tragova novca i sumnjivih transakcija. U tom smislu, da bi se finansijska istraga kvalitetno provela, neophodno je da stručna lica, prvenstveno forenzičkog računovodstva, sačine kvalitetan nalaz i mišljenje. Skoro svako tužilaštvo susreće se s problemom deficita stručnog kadra u ovoj oblasti, tj. zaposlenih lica ekonomske struke, a naročito onih kojima je uža oblast forenzičko računovodstvo. Također, finansijske mogućnosti za angažman stručnih lica, tj. vještaka su ograničene. U tom smislu, a uzimajući u obzir činjenicu da Agencija prilikom upravljanja privremeno oduzetih privrednih društava u pravilu angažuje vještake finansijske struke za svoje potrebe, smatramo da bi predloženom zakonodavnom intervencijom trebalo otvoriti put tužilaštvima da u ranoj fazi istrage mogu da koriste kapacitete Agencije, odnosno da posredstvom Agencije angažuju stručna lica koja će za potrebe tužilaštva vršiti potrebna finansijska vještačenja. Navedeno i zbog činjenice da je Agenciju potrebno uključiti u sami početak postupka oduzimanja imovine iz razloga adekvatne pripreme za njeno upravljanje, naročito privrednih društava.

Također, u dosadašnjoj praksi desilo se nekoliko slučajeva u kojima se tužilaštvo obraćalo Agenciji s prijedlogom da se novčana sredstva koja su predmetom pregovora o zaključenju sporazuma o priznanju krivnje, deponuju u Agenciji do okončanja postupka, tj. prihvatanja ovog sporazuma od strane suda, a sve kako bi se obezbijedilo izvršenje sporazuma.

U tom smislu potrebno je zakonom izričito propisati ovu mogućnost, a sve radi unapređenja efikasnosti postupka oduzimanja nezakonito stečene imovine krivičnim djelom.

Član 3. - Dosadašnji član 14. koji govori o predmetima krivičnog djela potrebno je izmijeniti u cijelosti. Naime, trenutna odredba ovog člana dovodi do zabune pri tumačenju i primjeni, jer Zakon o oduzimanju nezakonito stečene imovine krivičnim



djelom nigdje izričito i detaljno ne propisuje postupak oduzimanja predmeta krivičnih djela i načinom upravljanja istim, nego isključivo imovinske koristi.

Kako bi se izbjegle nedoumice koji se predmeti krivičnog djela oduzimaju (tj. oni koji su upotrijebljeni za izvršenje krivičnog djela ili oni koji su nastali učinjenjem krivičnog djela), smatramo da je potrebno precizirati član 14. na način da se propiše da svi predmeti krivičnog djela koji se trajno oduzmu u krivičnom postupku povjeravaju Agenciji na upravljanje.

Također, trenutni član 14. propisuje da sud donosi rješenje kojim se oduzima predmet krivičnog djela i to nakon što je krivični postupak okončan ili obustavljen, te da je protiv predmetnog rješenja dozvoljena žalba o kojoj neposredno odlučuje viši sud.

Smatramo da je postojanje ovakve odredbe suvišno iz razloga što je odredbama Zakona o krivičnom postupku Federacije Bosne i Hercegovine propisan postupak oduzimanja predmeta krivičnog djela, te kako bi se izbjegle nedoumice oko tumačenja i primjene predmetnog propisa, potrebno ga je brisati u postojećoj formi.

Također, neophodno je nedvosmisleno propisati da se trajno oduzeti predmeti krivičnog djela, ali i predmeti i imovinska korist pribavljeni izvršenjem prekršaja, povjeravaju Agenciji na upravljanje, što je praksa i drugih pravnih sistema u okruženju, čiji zakoni propisuju da su institucije za upravljanje oduzetom imovinom nadležne i za upravljanje predmetima krivičnih djela, te prekršaja (Hrvatska, Crna Gora, Srbija te u entitetu Republika Srpska).

Naime, postupanje oduzetim predmetima krivičnog djela, kao i predmeta pribavljenih izvršenjem prekršaja, predstavlja veliki problem pravosudnog sistema u našoj državi. Skladišta i depoi sudova, tužilaštava i MUP-ova su popunjena ovim predmetima (naročito motorna vozila), pa je ovoj problematici neophodno pristupiti sistemskom rješavanju.

To bi se svakako moglo riješiti na način da se upravljanje trajno oduzetim predmetima povjeri Agenciji, što bi u konačnici značilo da Agencija, odnosno Vlada Federacije Bosne i Hercegovine, takve predmete u ovisnosti od svakog konkretnog slučaja, može prodati, pokloniti, donirati u humanitarne svrhe, dati u najam, korištenje ili uništiti i to u skladu s odredbama Zakona o oduzimanju nezakonito stečene imovine krivičnim djelom kojima se propisuje način postupanja sa trajno oduzetom imovinom.

Također, predmetnim izmjenama potrebno je izričito propisati da se i privremeno oduzeti predmeti krivičnog djela mogu povjeriti Agenciji na čuvanje, jer je u dosadašnjoj praksi bilo takvih zahtjeva od strane nadležnih sudova.

Povjeravanjem predmeta krivičnih djela kao i predmeta pribavljenih izvršenjem prekršaja na upravljanje Agenciji nužno povlači i potrebu izmjene Pravilnika o unutrašnjoj organizaciji i sistematizaciji radnih mjesta, jer bi se kadrovski kapacitet Agencije morao proširiti iz razloga što bi se obim poslova enormno povećao, ali i razloga što bi bilo neophodno primiti stručni kadar kada je u pitanju postupanje sa specifičnim predmetima krivičnih djela, te dodatnu obuku postojećih kadrova. Pored navedenog, potrebno je i dodatno opremiti postojeća, te iznaći nova skladišta za potrebe Agencije, u skladu s odgovarajućim standardima za skladištenje specifičnih vrsta stvari. Sve navedeno bi zahtijevalo osiguranje dodatnih finansijskih sredstava za rad Agencije, međutim uzimajući u obzir činjenicu da bi se na ovaj način sistemski riješio problem postupanja sa trajno oduzetim predmetima iz krivičnih djela, kao i predmetima i imovinskom koristi pribavljenim izvršenjem prekršaja, te činjenicu da bi



prihodima od prodaje ovih predmeta određeni dio predstavljao prihod budžeta Federacije Bosne i Hercegovine, to u konačnici ne bi predstavljalo dodatno opterećenje po budžet.

Član 4. - U članu 17. koji propisuje mjere osiguranja imovinske koristi potrebno je izvršiti prilagodbu pojedinih termina pod definisani pojam „upravljanje“. Naime u stavu (2) tačka a. i b. potrebno je brisati riječ „čuvanje“, a ostaviti, odnosno dodati riječ „upravljanje“. Po trenutnoj zakonskoj odredbi stav (2) tačka b. odnosi se na mjeru osiguranja kojom se propisuje postupanje sa privremeno oduzetim pokretnim stvarima, te se prema trenutnom zakonskom rješenju iste povjeravaju Agenciji samo „na čuvanje“. Kao što je općepoznato, postoje različite vrste pokretnih stvari, s kojima se može različito postupati ovisno od njihove namjene. U tom smislu je potrebno da se privremeno oduzete stvari daju Agenciji na „upravljanje“ u smislu ranije definisanog pojma „upravljanja“, odnosno da Agencija ima mogućnost različitog postupanja istima, a sve radi očuvanja njihove vrijednosti ili novčane protuvrijednosti. Također, opće je poznato da pojedine stvari, ako ne i većina, svojom neupotrebom, tj. samim skladištenjem gube na vrijednosti. Ovo je naročito bitno u kontekstu povrata privremeno oduzetih stvari njenim vlasnicima. Naime, u pojedinim slučajevima je npr. efikasnije prodati privremeno oduzetu imovinu i dobijena novčana sredstva čuvati na posebnom računu Agencije, nego npr. samo „čuvati“ tu stvar, jer je činjenica da će ista nakon izvjesnog vremena izgubiti na vrijednosti. U prilog navedenoj činjenici ide i dužina trajanja samog krivičnog postupka, a evidentno je da određena imovina koja se ne upotrebljava toliki period, gubi na vrijednosti pa čak gubi i svoju namjenu. Stoga je potrebno ostaviti mogućnost različitog postupanja sa imovinom, naravno uzimajući u obzir svaki konkretan slučaj, odnosno šta bi u datom momentu bilo najbolje učiniti, što će svakako cijeliti Agencija.

Također, u tački f. koja se odnosi na vrijednosne papire, udjele u fondovima i udjele u privrednim društvima, potrebno je brisati dio odredbe „ili postavljanjem privremene uprave u društvu“, tako da stoji „...njihovim povjeravanjem na upravljanje Agenciji“. Naime, prema trenutnoj zakonskoj odredbi alternativno je postavljeno da sud može privredni subjekt povjeriti na upravljanje Agenciji ili da može postaviti privremenu upravu. Smatramo da je navedenu odredbu potrebno preformulisati iz razloga što kada sud povjeri Agenciji na upravljanje privredni subjekt, Agencija samim time odlučuje šta će raditi s istim u kontekstu postavljanja uprave društva, odnosno imenovanja direktora i sl. S druge strane, postavlja se pitanje, ukoliko sud rješenjem imenuje privremenu upravu (kako je trenutno određeno u Zakonu), ko će vršiti nadzor nad istom, sud ili Agencija.

Dalje, u kontekstu izvršenja rješenja o privremenoj mjeri, potrebno je preciznije definisati koji organ vrši izvršenje u kontekstu fizičkog oduzimanja imovine i ulaska u posjed iste. Prema trenutnoj zakonskoj odredbi „Izvršenje rješenja provodi sud, Agencija ili drugi organ određen Zakonom“ (član 17. stav 7.). Nigdje se dalje u Zakonu ne propisuje način provođenja rješenja, niti koji organ poduzima koju radnju, te je sam postupak ostao nedefinisan i izaziva brojne nedoumice u praksi.

Stoga smatramo da je potrebno propisati da izvršenje rješenja provodi sud, Agencija (u skladu s propisanim ovlastima) i drugi organ određen zakonom, te da je potrebno da sud rješenjem odredi koji organ je dužan da preduzeme pojedine radnje u provođenju izvršenja rješenja, uzimajući u obzir vrstu imovine koja se oduzima. Shodno navedenom, izvršenje rješenja bi primarno provodila Agencija uzimajući u obzir ovlasti koje je službenicima Agencije potrebno propisati u skladu s prijedlogom



izmjena ovog zakona. Na taj način bi službenici Agencije imali ovlasti slične onima koje imaju sudski izvršioc (jer *de facto* službenici Agenciji postupaju kao „službenici suda“ u smislu izvršenja sudskih odluka), s tim da bi u izvršenju rješenja, tj. fizičkom oduzimanju imovine i ulasku u posjed pomoć pružala policija i sudska policija u skladu sa svojim nadležnostima.

Također, potrebno je propisati da nadležni tužilac i prije nego što sudu podnese prijedlog za određivanje privremenih mjera oduzimanja imovine, ostvari potrebnu saradnju sa Agencijom u smislu informisanja o vrsti imovine koja će biti predmetom oduzimanja, a sve sa ciljem da Agencija poduzme potrebne radnje kako bi spremno dočekala preuzimanje i upravljanje predmetnom imovinom.

Također, neophodno je propisati rokove u kojima su nadležna tijela javnih registara dužni postupiti po zahtjevu Agencije u svrhu provođenja privremenih mjera osiguranja. Ovdje se prvenstveno misli na Registre pravnih lica koje vode nadležni Općinski sudovi, u slučajevima kada je potrebno da se za privremeno oduzeta privredna društva izvrši upis lica ovlaštenih za zastupanje u što kraćem roku kako bi se spriječilo eventualno otuđenje imovine od strane postojećih upisanih lica ovih privrednih društava.

Pored navedenog, jasno i nedvosmisleno se propisuje da se određivanjem privremene mjere prekidaju svi drugi postupci koji se vode povodom imovine koja je predmetom mjere osiguranja. Naime, u praksi se dešavaju slučajevi da se na određenoj imovini odredi mjera osiguranja, međutim povodom iste imovine paralelno se vodi drugi postupak, npr. izvršni postupak prodaje nekretnine, te se dešava da sudovi ne prekidaju te postupke uprkos mjeri osiguranja, te samim time dolazi do daljeg prometovanja nekretnina, pri čemu određena privremena mjera osiguranja kao i sam postupak oduzimanja imovine gubi svrhu.

Član 5. - Kao jedan od sistemskih problema koje je potrebno riješiti izmjenama i dopunama zakona jeste dosadašnja praksa (ne)pokretanje izvršnih postupaka pravomoćnih i izvršnih presuda.

Iako je važećim odredbama Zakona o oduzimanju nezakonito stečene imovine krivičnim djelom izričito propisano da se izvršni postupak provodi isključivo na prijedlog Federalnog pravobranilaštva, te na osnovu Zakona o izvršnom postupku, u praksi se dešava da Federalno pravobranilaštvo ne postupa po dostavljenim presudama i iste vraća Agenciji, uz obrazloženje da je izvršenje u nadležnosti postupajućeg suda, pritom ignorišući odredbe pomenutog Zakona, čime određeni broj pravosnažnih i izvršnih presuda kojima se oduzima imovinska korist stečena krivičnim djelom ostaje neizvršena.

Shodno navedenom, izmjenama Zakona neophodno je propisati nadležnost Federalne agencije za upravljanje oduzetom imovinom, da može pokretati izvršni postupak u ovakvim slučajevima. U tom smislu bi Agencija, kao organ koji se nalazi u cjelokupnom sistemu oduzimanja nezakonito stečene imovine, imala izričitu nadležnost da postupa u ovoj fazi postupka, te u tom smislu ne bi bilo nedoumica oko nadležnog organa koji pokreće izvršni postupak po pravosnažnim sudskim presudama kojima se oduzima imovinska korist stečena krivičnim djelom.

Ovim članom zakona bi se propisala i nadležnost Agencije da neposredno može izvršavati pravosnažne presude suda kojima se oduzimaju nezakonito stečena imovina u vidu stvari (npr. motorna vozila i druge pokretne stvari, ulazak u posjed



oduzetih nekretnina i sl.), ali da se ostavi mogućnost da i u ovim situacijama, u slučaju ukazane potrebe, može pokrenuti prijedlog za izvršenje u skladu sa ZIP-om (npr. izvršenje radi predaje pokretnih stvari, izvršenje radi ispražnjenja i predaje nekretnine).

Član 6. - Član 26. stav (5) trenutnog zakona potrebno je brisati iz razloga usklađivanja ovog Zakona sa Zakonom o državnoj službi u Federaciji Bosne i Hercegovine.

Također, u svrhu sistematičnosti i grupisanja odredbi po svom sadržaju, dosadašnji član 28. postaje stav (5) ovog člana, te član 29. u modifikovanoj formi postaje stav (6) ovog člana. Naime, ovim se vrši usklađivanje obaveze podnošenja izvještaja s ostalim upravnim organizacijama u Federaciji Bosne i Hercegovine, koje izvještaj o svom radu podnose isključivo Vladi Federacije Bosne i Hercegovine. Isti je potrebno formulisati u kontekstu vremenske obaveze podnošenja izvještaja o radu i propisati da se isti Vladi Federacije Bosne i Hercegovine podnosi jednom godišnje umjesto dosadašnjih šest mjeseci. Navedeno je u skladu s odredbom člana 22. Uredbe o planiranju rada i izvještavanja o radu Vlade Federacije Bosne i Hercegovine, federalnih ministarstava i institucija kojim je propisano da rukovodilac dostavlja godišnji izvještaj o radu institucije.

Također, obavezu podnošenja izvještaja o finansijsko-materijalnom poslovanju, potrebno je brisati iz razloga što je obaveza i dinamika ovakvog izvještavanja propisana Zakonom o budžetima u Federaciji Bosne i Hercegovine.

Član 7. - Dosadašnji član 27. potrebno je dopuniti. Naime, uzimajući u obzir činjenicu da se službenici Agencije prilikom izvršenja sudskih odluka kojima se oduzima imovina susreću sa situacijama koje se u svakom slučaju mogu podvesti pod pojam "posebni uslovi rada" propisani Zakonom o plaćama i naknadama u organima vlasti Federacije Bosne i Hercegovine, to je potrebno propisati i mogućnost za posebnu naknadu do 20% osnovne plaće kako je propisano članom 23. ovog zakona.

"Posebni uslovi rada" se naročito ogledaju u situacijama kada službenici Agencije prilikom izvršavanja sudskih odluka ostvaruju direktan kontakt s osumnjičenim, optuženim ili osuđenim, ili s njima povezanim licima pri izvršenju sudskih odluka o oduzimanju imovine, pri čemu se nailazi na otpor takvih lica što predstavlja sigurnosnu prijetnju službencima. Također, službenici Agencije prilikom izvršenja sudskih odluka o oduzimanju imovine, redovno direktno surađuju s policijskim tijelima što samo po sebi predstavlja specifične situacije sigurnosnog ambijenta. Pored navedenog službenici Agencije i tokom perioda upravljanja oduzetom imovinom dolaze u kontakt s ranije spomenutim kategorijama lica. Dakle, radi se o licima protiv kojih se provodi krivični postupak, a s kojim licima i članovima njihovih porodica službenici Agencije direktno dolaze u kontakt prilikom oduzimanja i upravljanja imovine.

Također, Zakonom je potrebno propisati da službenik Agencije prilikom predavljanja koristi službenu legitimaciju i značku. Dalje, potrebno je propisati ovlasti službenika Agencije prilikom izvršavanja sudskih odluka kod fizičkog oduzimanja imovine. U tom smislu potrebno je propisati ovlasti koje imaju sudski izvršioci, a koje su propisane Zakonom o izvršnom postupku (član 43 i 44.), jer se radi skoro o identičnim poslovima kod izvršavanja sudskih odluka oduzimanja imovine. Naime, službenici agencije *de facto* su „službenici suda“ u ovoj fazi postupka, jer sud direktno Agenciji dostavlja rješenje ili presudu o oduzimanju imovine, a ne npr. sudskim izvršiocima, a uzimajući u obzir činjenicu da se postupak oduzimanja imovine (kod privremenih mjera) smatra hitnim, provođenje dodatnih postupaka u smislu pokretanja izvršnog postupka bi obesmisliło privremene mjere osiguranja, jer u međuvremenu može da dođe do



otuđenja ili uništenja imovine koja je predmet sudske odluke. Također, odluke o oduzimanju imovine (rješenja i presude) u najvećem broju slučajeva donose Kantonalni sudovi koji nemaju svoje izvršno odjeljenje, pa se postavlja pitanje ko bi umjesto službenika Agencije mogao izvršiti ove odluke. Shodno tome, službenici Agencije moraju promptno djelovati, te se shodno tome jasno i nedvosmisleno moraju zakonom propisati ovlasti službenika Agencije u ovom pogledu, naročito uzimajući u obzir činjenicu da se vrši oduzimanje imovine, a pravo na imovinu je ustavom zagarantovano pravo svakog pojedinca, te da bi se izbjegla eventualna šteta prilikom izvršenja sudskih odluka, službenici Agencije moraju „znati granice svojih ovlaštenja u postupanju“.

Član 8. - Vidjeti obrazloženje člana 6.

Član 9. - Član 30. potrebno je dopuniti u smislu da Agencija upravlja i privremeno i trajno oduzetom imovinom po osnovu odluka Suda Bosne i Hercegovine, sudova Republike Srpske, sudova Brčko Distrikta Bosne i Hercegovine, te imovinom čije je raspolaganje ograničeno, u skladu s odlukama organa Ujedinjenih nacija i drugih međunarodnih organizacija, čiji je član Bosna i Hercegovina.

Ovo iz razloga što na nivou Bosne i Hercegovine trenutno ne postoji organ koji upravlja oduzetom imovinom po osnovu odluka Suda Bosne i Hercegovine, pa je u tom smislu potrebno otvoriti mogućnosti da Agencija u slučaju ukazane potrebe može pružiti pomoć i podršku Sudu Bosne i Hercegovine u provođenju svojih nadležnosti u ovoj oblasti. Također, potrebno je propisati da Agencija može postupiti i po odlukama sudova Republike Srpske i Brčko Distrikta Bosne i Hercegovine, iz razloga međuentitetske saradnje u ovoj oblasti, naročito u pogledu slučajeva oduzimanja nekretnina, dionica udjela u privrednim društvima i motornih vozila. Navedena odredba sadržana je i u Zakonu o oduzimanju imovine koja je proistekla izvršenjem krivičnog djela Republike Srpske, pa je istu potrebno propisati u Federaciji Bosne i Hercegovine radi usaglašavanja zakonodavstva u ovoj oblasti u Bosni i Hercegovini.

Također, ovim članom potrebno je propisati da se u svrhu prikupljanja informacija i podataka za potrebe sačinjavanja analiza, izvještaja i drugih poslova iz nadležnosti Agencije, omogući Agenciji pristup sistemu za automatsko upravljanje predmetima u pogledu finansijskih istraga i oduzimanja nezakonito stečene imovinske koristi, a sve radi efikasnosti i kvaliteta analiza i izvještaja. Uslove i način pristupa ovom sistemu definisao bi poseban Pravilnik koji bi donosio direktor Agencije uz prethodno pribavljeno mišljenje Visokog sudskog i tužilačkog vijeća.

Član 10. - Trenutni član 32. koji govori o prodaji trajno oduzete imovine, potrebno je izmijeniti. Naime, predloženim izmjenama predviđeno je da Vlada Federacije Bosne i Hercegovine donosi poseban propis o poslovima upravljanja oduzetom imovinom, koji treba detaljno da uredi postupak upravljanja odnosno poslove izvršenja sudskih odluka o privremenom i trajnom oduzimanju imovine, procjenu, skladištenje, čuvanje, korištenje, iznajmljivanje, davanje u zakup, prodaju, raspodjelu dobijenih prihoda, poklon, uništenje, povrat, kao i druga pitanja koja proizilaze iz poslova upravljanja imovinom.

Kada je u pitanju prodaja, predviđeno je da se vrši i prodaja privremeno oduzetih pokretnih stvari u slučaju ukazane potrebe. U tom pogledu prodaja privremeno i trajno oduzete imovine vrši se javnim nadmetanjem koje se objavljuje u jednom dnevnom listu i službenim novinama, zatim da se imovina prodaje po istoj ili višoj cijeni od procijenjene, te da postoje obavezno dvije prodaje kod trajno oduzete imovine, kao i



da se na drugoj prodaji imovina ne može prodati po cijeni nižoj od 50 % vrijednosti procjene, odnosno da se privremeno oduzete pokretne stvari mogu prodavati više puta s tim da cijena može biti umanjena samo do 10% od vrijednosti koja je procijenjena u momentu donošenja odluke o prodaji.

Također, u pogledu obavezne objave javnog nadmetanja, potrebno je zakonom propisati da ukoliko je vrijednost procijenjene imovine niža od 10.000,00 KM, da se objava javnog nadmetanja može izvršiti samo putem web stranice Agencije. Razlog je što je dosadašnja praksa pokazala da u pojedinim slučajevima troškovi objave javnog nadmetanja budu veći nego sama imovina koja se prodaje.

Odredbe o prodaji privremeno oduzete imovine sadržana je i u zakonodavstvu Evropske unije, i to i čl. 10. Direktive Evropskog parlamenta i Vijeća Evropske unije o zamrzavanju i oduzimanju predmeta i imovinske koristi ostvarene krivičnim djelima u Evropskoj uniji (2014).

Odredbe o prodaji privremeno oduzete imovine sadržane su i u zakonodavstvima regiona (Hrvatska, Srbija, Crna Gora te u entitetu Republika Srpska).

Navedeni postupak prodaje kako trajno, tako i privremeno oduzete imovine detaljno će se razraditi posebnim propisom o upravljanju oduzetom imovinom. Da je navedeni postupak prodaje potrebno detaljno propisati posebnim propisom, a ne zakonom, ukazuje činjenica što je postupak prodaje podložen stalnim izmjenama i prilagodbama stvarnim praktičnim situacijama, te je samim tim i proceduralno jednostavnije izmijeniti poseban propis koji donosi Vlada, nego izmijeniti zakon u tom pogledu.

Član 11. - Dalje, potrebno je dodati nove članove kojima će zakon propisati poslove, odnosno odrediti smjernice u kojem okviru treba detaljno da se razrade i propišu poslovi upravljanja oduzetom imovinom.

Zakonom je potrebno propisati i mogućnost poklona trajno oduzete imovine (član 33a.), kao i dijela novčanih prihoda dobijenih poslovima upravljanja tom imovinom, u svrhu općeg interesa i društvenih potreba. Intencija predloženih izmjena je u pravcu da se oduzeta imovina prvenstveno koristi za javni interes i socijalne svrhe, a ne da prodaja bude primarni cilj kako je trenutnim zakonskim rješenjem propisano. U prilog predloženoj izmjeni ide činjenica da je navedeni način postupanja oduzetom imovinom i praksa zemalja članica EU. U tom smislu i Direktiva Evropskoga parlamenta i Vijeća Evropske unije o zamrzavanju i oduzimanju predmeta i imovinske koristi ostvarene krivičnim djelima u Evropskoj uniji (2014) sugerira državama članicama razmatranje poduzimanja mjera koje bi omogućile da se oduzeta imovina upotrebljava za javni interes ili u socijalne svrhe (član 10.). Od zemalja EU s dobrom praksom se posebno ističu zemlje poput Belgije, Francuske, Italije i Luksemburga, te Ujedinjenog Kraljevstva. Također, predloženim izmjenama je intencija i da se javnosti pošalje jasna slika kako se kriminal ne isplati, kao i da će oduzeta imovina biti iskorištena na najbolji mogući način, odnosno kroz zadovoljavanje društvenih potreba. Kada je u pitanju sama procedura poklanjanja trajno oduzete imovine, odnosno novčanih prihoda dobijenih poslovima upravljanja iste, predviđeno je da Vlada Federacije Bosne i Hercegovine na prijedlog direktora donosi odluku. Detaljnija pitanja i kriterije odabira lica kojima se oduzeta imovina ima pokloniti, propisat će se posebnim propisom o upravljanju oduzetom imovinom koji donosi Vlada Federacije Bosne i Hercegovine.

---



Kada su u pitanju troškovi upravljanja oduzetom imovinom, zakonom (član 33.b) je potrebno propisati da se troškovi upravljanja oduzetom imovinom osiguravaju u budžetu Federacije BiH, te od novčanih sredstava iz člana 36. stav (4) Zakona.

Također, potrebno je zakonom propisati mogućnost da Vlada Bosne i Hercegovine na prijedlog direktora može donijeti odluku o priznavanju troškova upravljanja oduzetom imovinom, ukoliko se takvi troškovi ne nalaze u godišnjem budžetu Agencije. Navedena odredba je trenutno na snazi i propisana je Pravilnikom o postupku prodaje, najma, čuvanja i održavanja oduzete imovine („Službene novine Federacije BiH“, br. 5/16 i 106/21) koji je donijela Vlada Federacije Bosne i Hercegovine.

Sve navedeno potrebno je iz razloga što je budžetom teško predvidjeti troškove koje će Agencija imati u postupku upravljanja oduzetom imovinom. Naime, količina poslova upravljanja oduzetom imovinom u suštini zavisi od sudskih odluka koje će se dostaviti Agenciji, kao i od same prirode oduzete imovine, odnosno njene namjene. Svaki pojedini oblik imovine (nekretnina/stambena zgrada, poslovni prostor, poljoprivredno zemljište, različite vrste motornih vozila, privredni subjekti i sl.) zahtijeva specifične i različite troškove samog održavanja i upravljanja.

---

Zakonom (član 33c.) je neophodno propisati i obavezno uništenje oduzete imovine koja zbog svojih svojstava predstavlja prijetnju životu i zdravlju ljudi i životinja, zaštiti životne sredine i sl. U navedenim slučajevima, a zbog hitnosti samog postupka potrebno je propisati da odluku o uništenju iste donosi direktor Agencije. Također, u slučaju da se trajno oduzeta imovina ne proda, ne pokloni, ili se ne može iskoristiti na bilo koji način, za takvu imovinu Vlada Federacije Bosne i Hercegovine može na prijedlog direktora Agencije, donijeti odluku da se uništi. Također, u kontekstu trajno oduzetih privrednih društava koja su nelikvidna ili koja se ne prodaju nakon dva javna nadmetnja, neophodno je propisati da se provodi postupak likvidacije, a da se sa preostalim imovinom nakon likvidacije postupa kao s trajno oduzetom imovinom u kontekstu njenog upravljanja.

(2) Novim zakonskim rješenjem (član 33d.) potrebno je propisati i mogućnost da se trajno oduzeta imovina može dodijeliti na korištenje institucijama koje se primarno finansiraju iz budžeta Federacije Bosne i Hercegovine, kao i u humanitarne, društveno korisne i druge svrhe od javnog interesa. U tom smislu imovina bi i dalje bila vlasništvo Federacije BiH, ali u ovisnosti od vrste imovine, donosila bi se odluka o njenom davanju na korištenje navedenim institucijama u situacijama kada bi davanje na korištenje imalo bolji efekat od npr. prodaje, poklona ili davanja u zakup. Ovo bi predstavljalo alternativnu varijantu, a o načinu postupanja sa trajno oduzetom imovinom odlučivalo bi se u svakom konkretnom slučaju. Npr. trajno oduzeta nekretnina mogla bi se dati na korištenje određenom organu Federacije Bosne i Hercegovine u svrhu smještaja, čime bi se ostvarile uštede u budžetu Federacije BiH ili npr. da se trajno oduzeta motorna vozila daju na korištenje određenim organima.

Novim zakonskim rješenjem (član 33e.) potrebno je propisati zabranu učešća u svojstvu zainteresovanih lica u postupcima koji se odnose na prodaju, najam, zakup, poklon i davanje na korištenje oduzete imovine, licima zaposlenim u Agenciji, licima od kojih je oduzeta imovina, službenim osobama, tužiocima i sudijama koji su učestvovali u predmetnom postupku, te članovima porodice navedenih kategorija, kao



i pravnim licima u kojima navedena lica imaju udjele koji im omogućavaju većinsko pravo pri donošenju odluka. Sve navedeno kako bi se spriječile eventulane zloupotrebe.

Članovi porodice u smislu ovog zakona smatraju se članovi porodice određeni Krivičnim zakonom Federacije Bosne i Hercegovine.

Međutim, potrebno je zakonom izričito ostaviti mogućnost da članovi porodice koji su koristili privremeno oduzetu nekretninu u momentu oduzimanja (prije svega stambeni objekt) i dalje nastave koristiti pod nadzorom Agencije. Ovo prije svega iz razloga kako se ne bi zadiralo ustavom zagarantovano pravo na dom članova porodice lica od kojeg se privremeno oduzima nekretnina.

Član 12. - Trenutne odredbe člana 34. zakona propisuju način postupanja s novčanim sredstvima dobijenim od prodaje privremeno oduzete imovine, kao i postupanje imovinom u slučaju donošenja sudske odluke o njenom povratu vlasniku, te pravo vlasnika za naknadu štete.

Navedeni član je potrebno izmijeniti.

Naime, prilikom upravljanja privremeno oduzetom imovinom novčana sredstva mogu se dobiti ne samo prodajom te imovine nego i drugim oblicima upravljanja (zakup, premija od osiguranja i sl.). Shodno tome ukoliko sud donese odluku da se vlasniku vrati privremeno oduzeta imovina, postavlja se pitanje šta će biti s novčanim sredstvima stečenim upravljanjem privremeno oduzetom imovinom. U tom slučaju potrebno je propisati da ukoliko je navedena imovina bila pod zakupom i sl. i ostvarivala prihode, „višak“ ostvarenih prihoda pripada Agenciji, novac se čuva na posebnom računu, a da se vlasniku vraća iznos prihoda koji je ostvarivao na predmetnoj imovini do momenta oduzimanja. Npr. ukoliko je vlasnik privremeno oduzete nekretnine istu davao pod zakup i ostvarivao prihod od 5.000,00 KM za svaki mjesec, te ukoliko je istu nekretninu Agencija davala pod zakup u periodu privremenog upravljanja za zakupninu od 7.000,00 KM, a sud donese odluku da se predmetna nekretnina vrati vlasniku, u tom slučaju se vlasniku vraća i iznos od po 5.000,00 KM za svaki mjesec umanjen za iznos troškova održavanja iste, dok razlika novčanih prihoda ostaje na posebnom računu.

---

Novim zakonskim rješenjem (član 34a.) potrebno je predvidjeti način postupanja sa privremeno oduzetom imovinom, za koju je sud donio odluku da se vrati vlasniku, za koju se nesumnjivo utvrdi da je vlasnik ne želi ili nije u stanju preuzeti. U tom slučaju potrebno je predvidjeti mogućnost da ukoliko vlasnik privremeno oduzete imovine istu ne preuzme u roku od 6 mjeseci od dana zaprimanja poziva od strane Agencije ili u roku od 12 mjeseci od dana objavljivanja poziva za povrat vlasniku putem sredstava informisanja (u slučaju da je lice kome se imovina vraća nedostupan, tj. nepoznato mu je prebivalište i boravište), predmetna imovina postaje vlasništvo Federacije BiH, te Odluku o načinu upravljanja istom na prijedlog direktora Agencije donosi Vlada Federacije Bosne i Hercegovine.

---



Novim zakonskim rješenjem (član 34b.) propisuje se da se Agencija u okviru redovnog poslovanja finansira iz budžeta Federacije Bosne i Hercegovine u okviru jedinstvenog računa trezora. Međutim, da bi Agencija uspješno obavljala poslove kada je u pitanju upravljanje prvenstveno privremeno oduzetom imovinom i to u pogledu „deponovanja“ novčanih sredstava koja se privremeno oduzimaju, kao i ostvarenih novčanih „prihoda“ proisteklih iz poslova upravljanja privremeno oduzetom imovinom (npr. prihodi zakupnina, premije osiguranja i sl.), Agencija mora imati posebne račune za tu namjenu.

Predmetna novčana sredstva u toj fazi ne predstavljaju prihod budžeta Federacije Bosne i Hercegovine, pa samim time ne mogu da se uplaćuju u budžet, odnosno potrebno je da se navedeni novac „čuva“ na određenom posebnom računu do donošenja konačne odluke suda o statusu istog.

U tu svrhu potrebno je da Agencija ima otvoreno više posebnih računa i to jedan na koji bi se deponovao privremeno oduzeti gotov novac i isti samo „čuvao“ do konačne odluke suda, a ostali na koji bi se uplaćivala sredstva ostvarena upravljanjem oduzetom imovinom (prihodi od zakupnina, premije osiguranja, odbitni troškovi iz privremenog upravljanja u slučaju trajnog oduzimanja i sl.), te sa kojeg računa bi Agencija mogla koristiti novčana sredstva u svrhu nužnog održavanja oduzete imovine (npr. troškovi održavanja nekretnina – instalacije, cijevi, krećenje, čišćenje, procjena vrijednosti, osiguranje imovine, i sl.), te sa kojeg bi se vršila isplata eventualne štete prouzorkovane privremenim upravljanjem od strane Agencije, u slučaju da sud donese odluku o povratu imovine vlasniku, a šteta bude utvrđena, kao i druge poslove iz nadležnosti Agencije.

Također, s obzirom na „neizvjesnost“ sudskog postupka, tj. mogućnosti da sud u svakom momentu donese odluku o povratu privremeno oduzete imovine njenom vlasniku, neophodno je obezbijediti hitnost provođenja takve sudske odluke, pa je postojanje ovih posebnih računa i nužno za Agenciju.

Član 13. - Član 36. trenutnog zakonskog rješenja propisuje da prihodi dobijeni od prodaje privremeno ili trajno oduzete imovine pripadaju budžetu Federacije Bosne i Hercegovine.

Navedenu odredbu potrebno je dopuniti u smislu raspodjele prihoda, odnosno da trajno oduzeta novčana sredstva, te prihodi dobijeni od upravljanja trajno oduzetom imovinom pripadaju budžetu Federacije Bosne i Hercegovine nakon odbitka troškova koje je imala Agencija tokom perioda upravljanja istom (npr. zakup). Navedeni iznos koji bi ostajao na posebnom računu Agencije, Agencija bi koristila za nužne troškove održavanja imovine, s obzirom na već ranije obrazloženje u pogledu troškova koje Agencija ima u poslovima upravljanja, odnosno nemogućnosti preciznog predviđanja istih budžetom. Ovakvo zakonsko rješenje sadržano je i u zakonodavstvima u regionu npr. Srbija, Crna Gora, entitet Republika Srpska.

Također, dio prihoda poklanja se u humanitarne i društveno korisne svrhe, u skladu s intencijom novih zakonskih prijedloga da se oduzeta imovina i prihodi ostvareni od iste prvenstveno koriste u humanitarne, društveno korisne i druge svrhe od javnog interesa, a sve u cilju da, s jedne strane, država na ovaj način pomogne civilnom društvu, da pruži pomoć u radu obrazovnih, sportskih i drugih društveno korisnih kolektiva, ali i sa druge strane, da se na taj način motivišu nosioci pravosudnih funkcija (prvenstveno tužioci, ali i sudije) da se više posvete istraživanju oblika kriminaliteta iz



kojih se pribavlja imovinska korist, te da se nezakonito stečena imovina oduzima u većoj mjeri.

Čl. 14. i 15. - U prelaznim i završnim odredbama potrebno je propisati da će Vlada Federacije Bosne i Hercegovine u roku od 6 mjeseci od dana stupanja na snagu ovog Zakona, na prijedlog direktora Agencije, donijeti poseban propis o upravljanju oduzetom imovinom, kao i da će direktor u roku od 30 dana od dana stupanja na snagu donijeti Pravilnik o obliku i načinu upotrebe službene legitimacije i značke službenika Agencije.

Također, propisuje se da postupci koji se odnose na izvršenje sudskih odluka o privremenom i trajnom oduzimanju imovine, procjenu, skladištenje, čuvanje, korištenje, iznajmljivanje, davanje u zakup, prodaju, raspodjelu dobijenih prihoda, poklon, uništenje i povrat oduzete imovine, a koji su nisu započeti prije stupanja na snagu ovog Zakona, provest će se po odredbama ovog Zakona, te da zakon stupa na snagu osmog dana od dana objavljivanja u „Službenim novinama Federacije BiH“.

#### **IV - FINANSIJSKA SREDSTVA**

Za provođenje Zakona potrebno je osigurati dodatna finansijska sredstva iz budžeta Federacije Bosne i Hercegovine i to u vidu dodatka na plaću za radna mjesta državnih službenika i namještenika u Agenciji na kojima se obavljaju poslovi pod posebnim uvjetima i odgovornostima u iznosu do 20% osnovne plaće u skladu sa Zakonom o plaćama i naknadama u organima vlasti Federacije Bosne i Hercegovine .

Detaljnije objašnjenje dato je u obrazloženju člana 7.

Uzimajući u obzir trenutno stanje (ukupno 15 uposlenih), ukupan mjesečni iznos finansijskih sredstava u vidu dodatka na plaću u iznosu od 20% iznosio bi cca 8.000,00 KM (bruto) i to u slučaju kada bi svi uposleni imali maksimalan dodatak od 20%. Međutim, budući da se propisuje dodatak na plaću do 20% i to za pojedina radna mjesta utvrđena unutrašnjim aktima o radnim odnosima, predmetni iznos potrebnih sredstava bio bi manji od maksimalno predviđenih 8.000,00 KM (bruto).

Međutim, uzimajući u obzir činjenicu da bi se izmjenama i dopunama ovog Zakona proširila nadležnost Agencije i na upravljanje trajno oduzetim predmetima krivičnih djela, te činjenicu da bi prihodima od prodaje ovih predmeta određeni dio predstavljao prihod budžeta Federacije Bosne i Hercegovine, to u konačnici ne bi predstavljalo dodatno opterećenje po budžet.

Shodno navedenom, usvajanje ovog Zakona, odnosno njegova implementacija, suštinski ne bi predstavljalo dodatno opterećenje po budžet Federacije Bosne i Hercegovine.



**ZAKON O ODUZIMANJU  
NEZAKONITO STEČENE IMOVINE KRIVIČNIM DJELOM  
(„Službene novine Federacije BiH“, broj 71/14)**

**ODREDBE KOJE SE MIJENJAJU/ DOPUNJUJU / BRIŠU**

**Član 4.**

(1) Pojedini izrazi u ovom zakonu imaju sljedeća značenja:

- a) imovina predstavlja stvari i prava koja je stekao učinilac krivičnog djela ili povezana osoba, a obuhvata sve stvari i prava koja mogu biti predmet izvršenja te posebno nekretnine i pokretnine, potraživanja, poslovne udjele, vrijednosne papire, novac, umjetnine, plemenite metale i drago kamenje u vlasništvu, posjedu ili pod kontrolom učinioca krivičnog djela ili povezane osobe;
- b) imovinska korist pribavljena krivičnim djelom, u skladu s ovim i drugim zakonom, jeste svako povećanje ili sprečavanje smanjenja imovine koja potiče od krivičnog djela;
- c) vlasnik je počinitelj protivpravnog djela ili s njim povezana osoba;
- d) povezana osoba je: podstrekač ili pomagač u krivičnom djelu; pravni sljedbenik počinioca i saučesnika u krivičnom djelu ili druge fizičke ili pravne osobe za koje sud utvrdi da su na njih prenesene stvari ili prava koja predstavljaju imovinsku korist pribavljenu krivičnim djelom a da to prenošenje nije bilo u dobroj vjeri;
- e) treća osoba je osoba koja tvrdi da u pogledu imovine koja je predmet postupanja po ovom zakonu ima pravo koje sprečava njegovu primjenu i traži da se osiguranje ili izvršenje proglasi nedopuštenim;
- f) predlagač osiguranja je nadležni tužilac;
- g) protivnik osiguranja je optuženi i povezana osoba;
- h) oduzimanjem se smatra privremeno ili trajno oduzimanje imovine pribavljene krivičnim djelom;
- i) agencija je Federalna agencija za upravljanje oduzetom imovinom;
- j) poseban postupak za oduzimanje imovinske koristi opisan je u čl. 5., 6. i 7. ovog zakona i provodi se u izuzetnim slučajevima propisanim ovim zakonom;
- k) stranke u postupku oduzimanja imovinske koristi stečene krivičnim djelom, u procesnim situacijama vođenja posebnog postupka su po ovom zakonu tužilac i vlasnik;
- l) ostali izrazi koji su korišteni u ovom zakonu definirani su ZKPFBiH, Zakonom o parničnom postupku ("Službene novine Federacije BiH", br. 53/03, 73/05 i 19/06), Zakonom o stečajnom postupku ("Službene novine Federacije BiH", br. 29/03, 32/04 i 42/06) i Zakonom o izvršnom postupku ("Službene novine Federacije BiH", br. 32/03, 52/03, 33/06, 39/06, 39/09 i 35/12).

**Član 9.**

(1) Cilj finansijske istrage je prikupljanje svih dokaza koji ukazuju na obim, iznos, vrstu, stvarnu vrijednost i druge okolnosti u vezi sa zakonitim prihodima osumnjičenog ili optuženog, odnosno povezane osobe, njihovim troškovima života i stvarnim mogućnostima zakonitog sticanja imovine za koju postoje osnovi sumnje da je pribavljena krivičnim djelom.

(2) O rezultatima provedenih mjera i radnji institucija koja je dobila naredbu tužioca iz stava 1. ovog člana sačinjava izvještaj u kojem se navode svi podaci i informacije do



(2) O rezultatima provedenih mjera i radnji institucija koja je dobila naredbu tužioca iz stava 1. ovog člana sačinjava izvještaj u kojem se navode svi podaci i informacije do kojih se došlo tokom finansijske istrage. Uz izvještaj se prilažu svi prikupljeni dokazi, isprave, službene zabilješke i drugi materijali koji mogu poslužiti kao izvor saznanja za tužioca.

(3) Izvještaj iz stava 2. ovog člana dostavlja se tužiocu koji je donio naredbu iz člana 8. ovog zakona najkasnije u roku tri mjeseca od dana dostavljanja naredbe na postupanje. Ako se finansijska istraga ne završi u roku šest mjeseci od donošenja naredbe o provođenju finansijske istrage, potrebne mjere da bi se ova istraga okončala poduzet će kolegij tužilaštva.

(4) Ako je za realizaciju naredbe o provođenju finansijske istrage potrebno poduzimati radnje dokazivanja, primijenit će se odgovarajuće odredbe Zakona o krivičnom postupku.

(5) Sve dokaze do kojih se došlo provođenjem finansijske istrage postupajući tužilac može koristiti u redovnom ili posebnom postupku za oduzimanje imovinske koristi.

(6) Tužilac će naredbom obustaviti finansijsku istragu ako se ustanovi da nema dovoljno dokaza da su osumnjičeni ili optuženi, odnosno povezana osoba pribavili imovinsku korist iz krivičnog djela.

(7) Protiv odluke tužioca iz prethodnog stava ovog člana moguće je uložiti pritužbu uredu glavnog tužioca.

(8) Tužilac može ponovo otvoriti finansijsku istragu ako se dobiju nove činjenice i okolnosti koje ukazuju da postoje osnovi sumnje da su osumnjičeni ili optuženi, odnosno povezana osoba pribavili imovinsku korist iz krivičnog djela.

(9) Tužilac okončava finansijsku istragu kada nađe da je stanje stvari dovoljno razjašnjeno da se može podnijeti prijedlog za oduzimanje imovinske koristi pribavljene krivičnim djelom po odredbama ovog zakona.

#### **Član 14.**

(1) Ako sud utvrdi u toku postupka koji se vodi prema odredbama ovog zakona da su krivičnim djelom pribavljeni predmeti koji se po KZFBiH moraju oduzeti, donijet će rješenje o oduzimanju tih predmeta.

(2) Ako Zakonom nije drukčije propisano, rješenje iz stava 1. ovog člana donosi sud pred kojim se vodio postupak nakon što je postupak završen ili obustavljen. Protiv ovog rješenja je dozvoljena žalba o kojoj odlučuje neposredno viši sud.

#### **Član 17.**

(1) U cilju osiguranja imovinske koristi za koju se sumnja da je pribavljena krivičnim djelom, tužilac može u toku ili nakon okončanja krivičnog postupka ili kada nisu ispunjeni uvjeti za vođenje krivičnog postupka zbog okolnosti iz člana 5. stav 1. ovog zakona, predložiti osiguranje bilo kojom privremenom mjerom kojom se najefikasnije može postići svrha osiguranja.

(2) Osiguranje imovinske koristi iz stava 1. ovog člana može se odrediti:

a) zabranom otuđenja i opterećenjem nekretnine ili stvarnih prava upisanih na nekretnini, uz zabilježbu zabrane u zemljišnim knjigama, oduzimanjem nekretnine i njenim povjeravanjem na čuvanje i upravljanje Agenciji,

b) zabranom osumnjičenoj, optuženoj ili povezanoj osobi da otuđi, sakrije, optereti ili raspolaze pokretnom imovinom, oduzimanjem i povjeravanjem tih stvari na čuvanje Agenciji,



- c) oduzimanjem gotovog novca i vrijednosnih papira, te njihovom predajom Agenciji,
  - d) zabranom dužniku osumnjičene, optužene ili povezane osobe da im dobrovoljno ispuni svoju obavezu, te zabranom osumnjičenoj, optuženoj ili povezanoj osobi da primi ispunjenje te obaveze, odnosno da raspolažu svojim potraživanjima,
  - e) nalogom banci ili drugom pravnom licu da osumnjičenoj, optuženoj ili povezanoj osobi uskrati da na osnovu njihovog naloga izvrši isplatu novčanih sredstava sa njihovog računa u vrijednosti za koju je određena privremena mjera,
  - f) zabranom otuđenja ili opterećenja dionica, vrijednosnih papira, udjela u fondovima, udjela ili poslovnog udjela uz zabilježbu zabrane kod Registra vrijednosnih papira Federacije Bosne i Hercegovine, Registru privrednih društava, zabranom korištenja ili raspolaganja pravima po osnovu takvih dionica, vrijednosnih papira, udjela u fondovima, udjela ili poslovnih udjela, njihovim povjeravanjem na upravljanje Agenciji ili postavljanjem privremene uprave u društvu,
  - g) zabranom dužniku osumnjičene, optužene ili povezane osobe da im preda stvari, prenese pravo ili obavi drugu novčanu transakciju.
- (3) O prijedlogu tužioca za određivanje privremenih mjera iz stava 1. ovog člana rješenjem odlučuje sud koji bi bio nadležan za suđenje u krivičnom postupku za krivično djelo iz kojeg je pribavljena imovinska korist koja je predmet osiguranja. Ovo rješenje mora sadržavati i tačno vrijeme na koje je privremena mjera određena, nakon čega sud u zavisnosti od ishoda krivičnog postupka ili posebnog postupka za oduzimanje imovinske koristi donosi rješenje o produženju privremene mjere ili rješenje o ukidanju privremene mjere.
- (4) Rješenje kojim se određuju mjere osiguranja do podizanja optužnice donosi sudija za prethodni postupak, nakon podizanja optužnice do njenog potvrđivanja sudija za prethodno saslušanje, a nakon potvrđivanja optužnice, sudija pojedinac ili vijeće krivičnog odjeljenja suda u skladu sa ZKPFBiH, najkasnije u roku sedam radnih dana od dana podnošenja prijedloga tužioca iz stava 1. ovog člana.
- (5) Ako se radi o prijedlogu za osiguranje oduzimanja imovinske koristi koji se podnosi u okviru posebnog postupka iz člana 5. ovog zakona, o njemu odlučuje sud koji bi bio nadležan za suđenje u krivičnom postupku za krivično djelo iz kojeg je pribavljena imovinska korist.
- (6) Protiv rješenja iz stava 3. ovog člana može se izjaviti žalba neposredno višem sudu u roku tri dana od dana njegovog dostavljanja. Žalba ne zadržava izvršenje rješenja.
- (7) Izvršenje rješenja iz stava 3. ovog člana provodi sud, Agencija ili drugi organ određen Zakonom.
- (8) Rješenje iz stava 3. ovog člana dostavlja se sudu, Agenciji ili drugom organu nadležnom za njegovo izvršenje odmah, a najkasnije prvog narednog radnog dana nakon dana donošenja rješenja.
- (9) Postupak izvršenja rješenja iz stava 3. ovog člana smatra se hitnim.

## Član 24.

- (1) Ako ovim zakonom nije drukčije propisano, izvršenje radi oduzimanja imovinske koristi pribavljene krivičnim djelom određuje se i provodi na prijedlog Federalnog pravobranilaštva Federacije Bosne i Hercegovine u skladu sa Zakonom o izvršnom postupku u Federaciji Bosne i Hercegovine.
- (2) Za donošenje rješenja o izvršenju na osnovu presude kojom se oduzima imovinska korist pribavljena krivičnim djelom i donošenjem drugih odluka u tom postupku, nadležan je općinski sud koji je mjesno nadležan u sjedištu suda koji je donio presudu iz čl. 6. i 10. ovog zakona.



- (3) Za provođenje izvršenja na osnovu rješenja iz stava 2. Ovog člana nadležan je sud.
- (4) Sud provođenje izvršenja rješenja iz stava 2. ovog člana može u potpunosti ili djelomično povjeriti Agenciji.

#### **Član 26.**

- (1) Agencija je samostalna federalna upravna organizacija koja ima svojstvo pravnog lica.
- (2) Agencijom upravlja i rukovodi direktor kojeg nakon provedene konkursne procedure postavlja Vlada Federacije Bosne i Hercegovine u skladu sa Zakonom o državnoj službi u Federaciji Bosne i Hercegovine.
- (3) Direktor ima status rukovodećeg državnog službenika.
- (4) Direktor Agencije bit će imenovan najkasnije u roku 60 dana od dana stupanja na snagu ovog zakona. Vlada Federacije Bosne i Hercegovine imenovat će vršioca dužnosti direktora, ako u ovom roku ne bude imenovan direktor.
- (5) Direktor ne smije biti član organa političke stranke. Direktor Agencije se bira na mandat od četiri godine a jedna osoba može biti imenovana najviše u dva mandata uzastopno.

#### **Član 27.**

Na radnopravni status osoba zaposlenih u Agenciji primjenjuju se odredbe Zakona o državnoj službi u Federaciji Bosne i Hercegovine i Zakona o namještenicima u Federaciji Bosne i Hercegovine.

#### **Član 28.**

Direktor rukovodi Agencijom, zastupa i predstavlja Agenciju, te odgovara za zakonitost rada, pravilno i zakonito vođenje materijalno-finansijskog poslovanja Agencije.

#### **Član 29.**

Direktor je dužan svakih šest mjeseci podnijeti izvještaj o radu i finansijsko-materijalnom poslovanju Agencije Vladi Federacije Bosne i Hercegovine, koja ga dostavlja Parlamentu Federacije Bosne i Hercegovine na usvajanje. Ako izvještaj ne bude usvojen, Vlada Federacije Bosne i Hercegovine pokreće postupak za razrješenje direktora Agencije.

#### **Član 30.**

- (1) Agencija je nadležna za:
- a) upravljanje privremeno oduzetom i oduzetom imovinom po odredbama ovog i drugih zakona,
  - b) provođenje analiza u području oduzimanja imovinske koristi pribavljene krivičnim djelom,
  - c) stručnu edukaciju iz područja finansijskih istraga i oduzimanja imovinske koristi pribavljene krivičnim djelom,
  - d) obavljanje i drugih poslova propisanih ovim zakonom.



(2) Agencija nema operativne nadležnosti za provođenje finansijskih istraga i oduzimanje imovinske koristi pribavljene krivičnim djelom.

### **Član 32.**

(1) Prodaja imovine kojom u smislu ovog zakona upravlja i raspolaže Agencija vrši se javnim nadmetanjem koje se objavljuje u "Službenim novinama Federacije BiH" i u najmanje dva dnevna lista koja se distribuiraju na cijelom području Bosne i Hercegovine.

(2) Imovina se prodaje po istoj ili višoj cijeni od procijenjene vrijednosti koju je odredila Agencija. Vlada Federacije Bosne i Hercegovine donijet će poseban propis kojim će se propisati kriteriji za procjenu vrijednosti imovine.

(3) U slučaju da imovina ne bude prodana nakon jednog javnog nadmetanja, prodaja se može izvršiti na drugom javnom nadmetanju, ali za cijenu koja ne može biti niža od 50% vrijednosti procijenjene imovine.

(4) Ako se u toku godinu dana imovina ne proda, imovina može biti poklonjena instituciji koja se primarno finansira iz budžeta Federacije Bosne i Hercegovine ili u humanitarne svrhe, ili uništena.

(5) Odluku o poklonu imovine i odluku o uništenju imovine iz stava 1. ovog člana donosi Vlada Federacije Bosne i Hercegovine na prijedlog direktora Agencije. Troškove uništenja imovine snosi Agencija.

(6) Prodaja dionica i drugih vrijednosnih papira vrši se u skladu sa zakonima koji uređuju tržište vrijednosnih papira.

(7) Vlada Federacije Bosne i Hercegovine će na prijedlog federalnog ministra pravde posebnim pravilnikom propisati postupak prodaje, najma, čuvanja i održavanja oduzete imovine.

### **Član 34.**

(1) Novčana sredstva dobijena od prodaje imovine iz člana 33. stav 1. ovog zakona Agencija drži na posebnom računu do konačne odluke suda o njenom porijeklu. Ova novčana sredstva mogu se oročavati isključivo kod banaka u većinskom vlasništvu Federacije Bosne i Hercegovine. Prihod od kamate pripada Agenciji.

(2) Vlasniku privremeno oduzete imovine za koju je u skladu s ovim zakonom utvrđeno da ne potiče iz krivičnog djela, bez odgađanja se vraćaju novčana sredstva dobijena prodajom te imovine uz obračunatu kamatu po viđenju.

(3) Vlasnik koji smatra da isplatom sredstava iz prethodnog stava nije isplaćena adekvatna vrijednost imovine može podnijeti Agenciji zahtjev za naknadu štete prouzrokovane privremenim oduzimanjem imovine.

(4) Ako zahtjev za naknadu štete ne bude usvojen ili Agencija ne donese odluku o tom zahtjevu u roku tri mjeseca od dana podnošenja zahtjeva, vlasnik te imovine može nadležnom sudu podnijeti tužbu za naknadu štete protiv Federacije Bosne i Hercegovine.

(5) Ako je zahtjev djelomično usvojen, vlasnik može podnijeti tužbu u odnosu na preostali dio zahtjeva.



### **Član 36.**

Prihodi dobijeni od prodaje privremeno ili trajno oduzete imovine pripadaju budžetu Federacije Bosne i Hercegovine.

### **Član 40.**

(1) Vlada Federacije Bosne i Hercegovine će u roku 15 dana od dana stupanja na snagu ovog zakona imenovati komisiju koja će provesti postupak izbora direktora Agencije.

(2) Direktor će u roku 30 dana od dana imenovanja donijeti pravilnik o unutrašnjoj organizaciji i sistematizaciji radnih mjesta, uz saglasnost Vlade Federacije Bosne i Hercegovine.

(3) Vlada Federacije Bosne i Hercegovine će u roku 60 dana od dana stupanja na snagu ovog zakona donijeti akt iz člana 32. stav 7. ovog zakona.



## Chryzacyl FP-DA

[illegible][illegible]



Ze provedbe Zakona prethodno je održana stručna transakcija sredstva iz budžeta Federacije Bosne i Hercegovine i to u vidu dodatka na plaću za mjesec rujna državnih službenika i zamjenika u Agenciji na kojima se obavljaju poslovi na posrednim uslugama odgovarajućima u iznosu do 20% osnovne plaće u skladu sa Zakonom o plaćama i plaćanju u općinama i općinama vlasti Poreznice Bratstvo i Hercegovina.

Detaljne obilježbe iro su u

[illegible]



D.4. Promjena broja zapisnika		SISTEMATIZOVANO				PLANIRANO PROMJENOM				TREKUTNO STANJE				POTREBNO			
PERIOD		Postupke stanje (n)		Postupke stanje (n)		Postupke stanje (n)		Postupke stanje (n)		Postupke stanje (n)		Postupke stanje (n)		Postupke stanje (n)			
		n+1	n+2	n+1	n+2	n+1	n+2	n+1	n+2	n+1	n+2	n+1	n+2	n+1	n+2		
Obrazloženje																	
5. Polnjaline obavješ za proračun																	
NAZIV																	
Garancije																	
Ostalo																	
E.6. Fiskalni ciklus na dužini razine																	
NAZIV																	
Proračun BJK, Izvanproračunski fondovi i																	
Proračun Federacije Bosne i Hercegovine,																	
Federalni Izvanproračunski fondovi i																	
Proračun kantona, Izvanproračunski fondovi i																	
Proračun Brčko distrikta Bosne i																	
Hercegovine																	
Jednako lokalna samouprava (općine i																	
gradovi)																	
F.7. Pristup popisa odgovornog lica																	
odgovornosti																	

Sarajevo 14.03.2022.

Mjesto i datum





IZJAVA O USKLADENOSTI		
1. Podaci o obrađivaču propisa	Naziv federalnog organa uprave, odnosno federalne upravne organizacije	Federalna agencija za upravljanje oduzetom imovinom
	Naziv organizacione jedinice	—
2. Naziv propisa		
Prednacrt Zakona o izmjenama i dopunama Zakona o oduzimanju nezakonito stečene imovine kaznenim djelom Preliminary Draft Law on Amendments to the Law on Confiscation of Illegally Acquired Property by Criminal Offense		
3. Usklađenost propisa s odredbama Sporazuma o stabilizaciji i pridruživanju		
3.1.	Odredba Sporazuma	Glava VII, Pravda, sloboda i sigurnost, članak 78. Jačanje institucija i vladavine prava.
3.2.	Ocjena ispunjenosti iz navedene odredbe Sporazuma	Ispunjava u potpunosti
3.3.	Razlozi za djelimično ispunjavanje odnosno neispunjavanje obaveze iz navedene odredbe Sporazuma i rok u kojem je predviđeno postizanje potpune usklađenosti	/
4. Veza propisa sa Programom integrisanja (PI)		
4.1.	PI za period	/
4.2.	Poglavlje, potpoglavlje	/
4.3.	Rok za donošenje propisa	/
4.4.	Napomena	/
5. Usklađenost propisa s pravnom tečevinom EU		
5.1.	Primarni izvori prava EU	Ugovor o funkcioniranju Europske unije (pročišćeni tekst 2016.); Dio treći – politika i unutarnja djelovanja Unije, Glava V. Područje slobode, sigurnosti i pravde; Poglavlje 1. Opće odredbe, članak 67. stavak 1. i 3., Poglavlje 4. Pravosudna suradnja u kaznenim stvarima, članak 82. stavak 2. točka (c).  Treaty on the Functioning of the European Union (consolidated text 2016); Part Three – Union policy and internal action, Chapter V. Area of freedom, security and justice; Chapter 1, General Provisions, Article 67 (1) and (3), Chapter 4 Judicial cooperation in criminal matters, Article 82 (2) (c).



5.2.	Sekundarni izvori prava EU	<p>DIREKTIVA 2014/42/EU EUROPSKOG PARLAMENTA I VIJEĆA od 3. travnja 2014. o zamrzavanju i oduzimanju predmeta i imovinske koristi ostvarene kaznenim djelima u Europskoj uniji (SL L 127, 29.04.2014., str. 39)</p> <p>Ispravak, SL L 138, 13.5.2014., str. 114 (2014/42)</p> <p>DIRECTIVE 2014/42/EU OF THE EUROPEAN PARLIAMENT AND OF THE COUNCIL of 3 April 2014 on the freezing and confiscation of instrumentalities and proceeds of crime in the European Union (OJL 127, 29.04.2014, p.39)</p> <p>Corrigendum, OJ L 138, 13.5.2014, p. 114 (2014/42)</p>
5.3.	Stepen usklađenosti sa sekundarnim izvorima prava	Djelimično usklađeno
5.4.	Razlozi za djelimičnu usklađenost ili neusklađenost	<p>Osnovni tekst kao i predložene izmjene i dopune Zakona o oduzimanju nezakonito stečene imovine kaznenim djelom u značajnoj mjeri usklađene su s osnovnim principima i načelima europskoga prava, naročito DIREKTIVOM 2014/42/EU EUROPSKOG PARLAMENTA I VIJEĆA od 3. travnja 2014. o zamrzavanju i oduzimanju predmeta i imovinske koristi ostvarene kaznenim djelima u Europskoj uniji - zadnja prečišćena verzija od 19.05.2014. godine.</p> <p>U narednom razdoblju, intenziviranjem procesa pristupanja BiH u Europsku uniju, planirano je da se predmetni zakon u potpunosti uskladi s europskom pravnom stečevinom i navedenom direktivom, te da se u cijelosti preuzme i primjenjuje UREDBA (EU) 2018/1805 EUROPSKOG PARLAMENTA I VIJEĆA od 14. studenoga 2018. o uzajamnom priznavanju naloga za zamrzavanje i naloga za oduzimanje.</p> <p>Ova Uredba nije bila predmet usklađivanja sa ovim Prednactom iz razloga što ista reguliše oblast uzajamnog priznavanja naloga za zamrzavanje i oduzimanje imovine između država članica (sudovi i tužilaštva) što je u slučaju Bosne i Hercegovine oblast međunarodne pravne pomoći čija je nadležnost utvrđena na državnom nivou, dok je predmet Prednacta u najvećoj mjeri vezan za modalitete upravljanja oduzetom imovinom od strane Agencije.</p> <p>U osnovnom tekstu Zakona (član 37.) propisane su obaveze postupanja Agencije u postupcima pružanja međunarodne pravne pomoći u smislu neophodne saradnje sa nadležnim organima Bosne i Hercegovine u postupcima koji se odnose na privremeno i trajno oduzimanje imovine.</p>



5.5.	Rok za potpuno usklađivanje	Rok za usklađivanje koji je određen SSP-om je istekao 01.06.2021. godine. Usklađivanje prije ovog roka nije izvršeno iz razloga što je Zakon o oduzimanju nezakonito stečene imovine „relativno mlad propis“ koji se počeo primjenjivati 2015. godine, te je u ovom periodu bilo potrebno steći određena praktična iskustva koja su pokazala potrebu donošenja izmjena i dopuna ovog Zakona u cilju unapređenja ove oblasti.
5.6.	Ostali izvori prava EU	/
6.	Ukoliko ne postoje odgovarajući propisi EU sa kojima je potrebno izvršiti usklađivanje potrebno je to konstatovati	/
7.	Da li je osiguran prevod pravnih izvora na službene jezike u upotrebi u Federaciji Bosne i Hercegovine	
8.	Da li je propis preveden na engleski jezik	
	 <p>           Predsjednik Uprave            Sekretar            Adnan Zeković            Potpis         </p>	 <p>           Zeljko Siladi, direktor Ureda Vlade Federacije            Bosne i Hercegovine za zakonodavstvo i            usklađenost s propisima Europske unije         </p>
Datum i pečat: 14.06.2021. godine		
		18-06-2021



Obrazac broj: 2

KONTROLNA IZJAVA O PROVEDENOJ PROCJENI UTJECAJA PROPISA

Kontrolna izjava o provedenoj procjeni utjecaja propisa		
Naziv prednacrta/nacrta zakona	Prednacrt zakona o izmjenama i dopunama Zakona o oduzimanju nezakonito stečene imovine kaznenim djelom	
Datum	18.06.2021.godine	
Kontrolno područje	DA	Obrazloženje Ureda Obrađivač je sukladno članku 14. stavak (2) Uredbe o procjeni utjecaja propisa ("Službene novine Federacije BiH", broj 67/20), u roku od 10 dana postupio po zahtjevu Ureda i dostavio Obrazac za sprovođenje skraćene procjene utjecaja propisa 1a iz stavka (1) ovoga članka, pravilno popunjen i razrađen sukladno ovoj Uredbi.
AKTIVNOST		
Naziv prednacrta/nacrta zakona je naveden i razumljiv	DA	
Naveden je naziv i kontakt obrađivača	DA	
Naveden je datum	DA	
DEFINIRANJE PROBLEMA		
Problem je jasno i sažeto objašnjen	DA	
Ciljevi su jasno i sažeto objašnjeni	DA	
Očekivani rezultati su jasno i sažeto objašnjeni	DA	
KONZULTACIJE		
Zainteresirane strane su jasno definirane	DA	
Proces konzultacija je jasno i sažeto objašnjen	DA	
PREDLOŽENA RJEŠENJA		
Predložena su normativna i nenormativna rješenja	DA	
Definirani su rizici predloženog rješenja	DA	
Definiran je uticaj rješenja na proračun	DA	



Definiran je uticaj rješenja na gospodarstvo, društvo, okoliš, te održivi razvoj i zdravlje ljudi	DA	
Definiran je način primjene i usuglašenost s ostalim propisima	DA	
Definirano je prelazno razdoblje	DA	
PROCJENA PROVEDENA SUKLADNO UREDBI	DA	



UREDA VLADE FBiH ZA ZAKONODAVSTVO I USKLADENOST

ZA PROMISIMA EVROPSKE UNIJE

Zeljka Štadić, Direktor Ureda

OVLAŠTENA OSOBA

Kristina Maric